

Date – 18/11/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Sorkar laipuaia Chief Information Commissioner, Heeralal Samariya-an Right to Information Act chu sorkar khalh ngil tura mipuite hmanraw pawimawh tak a ni mek a ni a ti.
2. I&PR Minister Dr. Vanlalhlana chuan chanchinbumite chu ram khalh ngiltu, mipuite hnena thu hriattirtu an ni, a ti.
3. G20 Summit 19-na hman turin Prime Minister Narendra Modia chuan vawiin khan Brazil a thleng.
4. Maharstra Assembly inthlan leh Jharkhand Inthlan thawhnhnihna atana campaign chu vawiin tlai khan a tawp a. Nilainiah vote thlak a ni ang.

<><><>

CIC

Sorkar laipuaia Chief Information Commissioner, Heeralal Samariya-a chuan mipuiten Right to Information Act an hman tangkai a, sorkar khalh ngil tura mipuite hmanraw pawimawh tak, a ni mek a ni a ti.

Mizoram tlawha lo zin mek Chief Information Commissioner chuan vawiina Mizoram Information Commission pisa a tlawhnaah Akashvani palai zawhna chhangin mipuiten RTI an hman tangkai chuan sorkar hotuten thutlukna dik an siam theih phah thin a ni, a ti a. State sorkar tinin RTI hmangin mipuite zawhna an dawng thin tih sawiin ni 30 chhunga chhan ngei ngei thin a nih thu leh sorkar chhannaah mi an lungawi lo a nih chuan zawh chhunzawm nan 1st appeal leh 2nd appeal thlenga a awm thu a sawi a. Sorkar laipuaiah pawh kum tin RTI zawhna Nuai 40 atanga Nuai 50 an dawn thin thu a sawi a, hei hian mipuiten tangkai tak leh phur takin an thil hriat duh te hre turin RTI an hman tangkai tih a tihlan thu a sawi.

Chief Information Commissioner chuan RTI Act chuan engkim langtlanga a siam thu a sawi a, hei hian sorkar tha a siam thei a ni, a ti a. Mipuite khalh ngil theih leh mipuite duhdan ngai pawimawh sorkar tha a siam thei dawn tih a sawi a. India ram pumah hybrid mode kalpui zel a nih tawh thu sawiin hemi awmzia chu internet kaltlangin e-registration kalpui a ni a, file pawh electronic file a vawn a ni vek tawh a, changkang leh awlsam taka kalpui zel tawh a ni, a ti. Chief Information Commissioner chuan Mizorama mipui, lehkha thiam tam lutuk te, Mizoramin ramngaw a nei tha em em mai te leh kawngpuia inkaihhraina tha avanga lirthei 'horn' hmeh rik tuarh tuarh awm ve lo chu nuam a tih thu leh a chenna nena khaikhinin vanram ang mai a nih thu a sawi bawh a ni.

Chief Information Commissioner hian Reiek Tourist Resort a tlawh ang a, naktukah Serchhip district a tlawh dawn bawk a ni.

<><><>

SHC OATH TAKING

Sinlung Hills Council (SHC) inthlan neih zawh taka thlan tlin mi 12 te chu vawiin khan Aizawl DC Pu Lalhriatpuia'n rinawmna thu tiamtirin a la lut.

Sinlung Hills Council-ah hian MNF member Vanbawng bial atanga thlan tlin Pu Ricky Lalremsanga chu Chief Executive Member a ni a, Chairman atan Tinghmun bial atanga MNF ticket-a thlan tlin R. Lalfakzuala chu chuhtu awm loin tlinga puan a ni a; Executive member atan MNF atanga thlan tlin Zokhumthanga leh HPC-R atanga thlan tlin Melody Lalchhuangzeli leh Lalhriatchhunga Hmar te ruat an ni.

Chief Executive Member thar Pu Ricky Lalremsanga chuan Akashvani zawhna chhangin Sinlung Hills Council mipuiten an beisei anga hmasawmna an thlensak theih nan theihtawp an chhuah dawn, a ti a. Mipuite hre renga hna thawh an tum tih sawiin sum dinhmun en fel bakah hmasawmna tura hmalak chu an tih hmasak tur zinga mi a ni, a ti bawk.

(BYTE CEM)

Tun thla ni 5-a Sinlung Hills Council inthlanah khan MNF-in bial 5 an la a, an thawhpui HPC-R in bial 2 la-in sorkarna an siam thei a. ZPM in bial 4 la-in Congress in bial 1 an la a ni.

<><><>

MIZORAM STATE POLICY COORDINATION COMT

Mizoram State Policy Coordination Committee in Bana Kaih Scheme hnuai a dilna lutte Implementing Department-ten an thlitfim hnu a sum mamawh zat zirchiangin vawiin khan Planning & Programme Implementation Department Committee Room-ah an thukhawm.

Adviser to Chief Minister (Implementation of Hand Holding Policy) Dr. KC Lalmalsawmzauva hoa thutkhawmah hian Dr. KC Lalmalsawmzauva chuan hlawhtlin tuma thiamna leh theihna nei, mi tumruhte kaih chhuahna tur 'Bana Kaih Scheme' thawhkhatna atan November thla chin a dilna lutte endik hmasak a nih tur thu a sawi a. Implementing Department-a Nodal Officer-ten uluk tak a dilnate an zirchian hnuah Apex body chuan a endik leh tur thu a sawi a ni.

Thutkhawma tarlan danin Implementing Department atangin dilna 8370 a lut tawh a, Implementing Department-a Nodal Officer leh Search Team ten zirchianna an kalpui tawh a. Commerce & Industries Department-ah dilna lut tam berin 3346 a lut a, Animal Husbandry & Veterinary Department ah dilna 2758-a lut bawk a ni.

Aizawl district atangin dilna 1741-a lut a, Lawngtlai atangin 1413, Champhai 1228, Mamit 715, Kolasib 702, Siaha 667, Saitual 567, Lunglei 578, Serchhip 349, Khawzawl 326 leh Hnathial district atangin dilna 84 lut tawh anga chhinchhiah a ni. Implementing Department hnuai Nodal Officer leh Search Team-te endik hnu ah vawiin thleng khan Pilot Phase atan a Apex Body-te ennawn leh turin dilna 190 thehluh a ni.

<><><>

NATIONAL PRESS DAY

I&PR Minister Dr. Vanlalhlana chuan chanchinbumite chu ram khalh ngiltu, mipuite hnena thu hriattirtu an ni, a ti.

Vawiina I&PR Auditorium-a a hoa National Press Day puala hun hmanah he thu hi Minister hian a sawi a. Minister chuan thu dik finfiah ngai pawimawh turin chanchinbumite a fuih a. Khawvel changkang zela thil a danglam anga an danglâm ve ngam loh chuan chanchinbumite chu tangkai lo leh hman tlak loh an ni mai dawn a ni, a ti a. An thuziak hmanga mipuite chu hmasawna lama rualawt tura siam theitu an nih thu sawiin Minister chuan sorkara a nihna chelh ang pawha a dik lohna te hrilh thin turin chanchinbumite chu a sawm a, hma sawn zel turin duhsakna a hlan a ni.

National Press Day puala hun hman hi I&PR Director Pu C. Lalnunkima'n a kaihruai a. Mizoram University-a Forestry department-a zirtirtu Dr. David C. Vanlalfakawma'n kumin National Press Day thupui a sawizau a. Mizoram Journalist Pension Book sem chhuah a ni bawk.

National Press Day hi District dangah pawh urhsun taka hman a ni.

<><><>

AMC INSPECTS RESTAURANTS AND HOTELS

Aizawl Municipal Corporation (AMC) chuan vawiin atanga restaurant leh hotel an endikah AMC phalna neilo restaurant tam tak an awm tih hmuhchhuah a ni.

AMC hnuaiia Committee on Regulations of Restaurant, Hotel & Hostel te chuan, vawiin khan Aizawl Khawpui chungga Restaurant leh Hotel-te endik hna a tumkhatna atan a kalpui a. AMC Registration te, Bawhlawh thliar hran leh an hmun hma faina lam te endik a ni a, Aizawl khawpui chungga restaurant te AMC a registration/ Dawr License neilo tam tak an awm tih hmuhchhuah a ni.

Tun thla ni 4-a Press Release an lo neih tawh angin la inching fel lo te chu tun thla chungga lo inchingfel turin hriattir nawn leh an ni a. Hemi hnu lamah hi chuan, License nung lo emaw, registration ti lo emaw te chu, an dawr khar sak emaw, AMC Licensing Regulations 2012 in a sawi angin Rs. 5000 thlenga chawitir theih an ni.

Endik hna thawktu regulations committee-ah hian AMC Corporator te member an ni a. Chairman-ah Pu Rosiamngheta, Secretary-ah Pu H. Lalremtuanga leh member-ah Pi Chuauzikpuii, Pi Zodingpuii, Pi C. Lalchhandami leh Pu David Zohmangaiha te an ni.

<><><>

NATIONAL PHARMACY WEEK & WORLD ANTIBIOTICS RESISTANCE AWARENESS WEEK OBSERVED

Mizoram Pharmacists' Association leh Health & Family Welfare Departmentchuan rampuma Pharmacy hapta leh antibiotics hman fimkhur pawimawh zia inzirtirna hapta an hmang.

Vawiin khan H&FW Dept. Principal Director hovin a huhoa kea kal, Walkathon huaihawt a ni a, Millenium Centre atanga Vanapa hall thleng an kal a. He huna khuallian Principal Director Dr. Vanlalsawma chuan hriselna kawngah mipui tan Doctor, nurse leh thawktu dang dang an tangkhawm tih sawiin pharmacist te chu technical taka damdawi lama thiamna bik nei an nih thu thu a sawi a, hetiang a anmahni kaihnawih hun an hmang thei chu lawmawm a tih thu a sawi a. Mipuiin antibiotics leh damdawi dang reng reng

pawh mipui hnena zirtirna pe zela an awmna hmun theuhah taima taka hna thawk tur leh, damlo tana tangkai taka thawk zel turin a fuih a ni.

National Pharmacy Week leh World Antibiotics Resistance Awareness Week pual hian Zonet cable TV-ah talk show buatsaih a ni bawk a. Pharmacy, Medical, leh Dental lama mithiamten hun an hmang a ni.

<><><>

PM IN RIO

G20 Summit 19-na chu zanin hian Brazil khawpui Rio de Janeiro-ah tan a ni dawn. He hunah hian member ramte leh khawvel huap aiawhte an tel dawn a ni. Prime Minister Modia chuan he inkhawmpuiah hian khawvel thilthleng pawimawh tak taka India ngaihnan te a sawichhuak dawn a. Hei bakah hian G20 New Delhi Leaders' Declaration bakah Voice of the Global South Summit a thlen zawh takah an thurel te a dinpui bawk ang.

(VC)

Prime Minister Narendra Modia hian vawiin khkan Rio khawpui a thleng a. India miten phur takin an lo dawngsawng a. Brazil ah hian India mi 4000 atanga 4500 bawr vel an khawsa a ni. Heng mite hian Prime Minister hi phur takin an hmuak a ni..

<><><>

AYUSHMAN

Ayushman Vay Vandana Card chuan vawiin khan mellun pawimawh tak phunin kum 70 chunglam mi nuai 10 in card an siam tir tawh. He card hmang hian kum upa te chu Ayushman Bharat Pradhan Mantri Jan Arogya Yojana hnuaiah a thlawnin damlo enkawlina an dawng thei dawn a. Union Ministry of Health and Family Welfare chuan October ni 29-a Prime Minister Modia'n he scheme hi a hawn anih atangin kar thum chhungin hetiang dinhmun hi a thleng thei a. An zinga nuai 4 hi hmeichhia an nih thu Union Health Ministry chuan a tarlang bawk a ni.leh thupek dinhmun chu an ngai thutak hle tih a sawi a ni.

<><><>

ELECTION

Maharstra Assembly inthlan leh Jharkhand Inthlan thawhnhina atana campaign chu vawiin tlai khan a tawp a. Political Party hruaitu senior ten campaign tawp ni ah hian mipuite vote hui thei turin theihtawpin tan an la a Naktip Nilaini hian vote thlak a ni ang.

Maharashtra-ah hian Assembly seat 288 ah vote thlak a ni dawn a. Kan Correspondent report I lo ngaihla ang u.

Jharkhand ah chuan inthlan thawhnhina atan hian theihtawp chhuahin Party hruaitute an chhuak a. Tun tumah hian bial langsar tak takah inthlan a ni dawn a. Heng zingah hian Dumka, Shikaripada, Deoghar leh Litipara te an tel a.

Vawiina Raj Mahal-a a campaignnaah BJP hruaitu leh UP CM Yogi Adityanath chuan BJP an sawrkar chuan Bangladesh atanga dan kalha pem zawng zawngte hnawhchhuah vek an ni ang tih a tiam a. Hetihlai hian Chief Minister leh JMM hruaitu Hemant Soren chuan BJP chua sakhuana changchawia mipuite thendarhah a puh a ni.

Puan tawh angina vote tla te hi tun thla ni 23 ah chhiar a ni ang.

<><><>